

Morning Dogri
(NSD) National News Bulletin

29-06-2025

- प्रधानमंत्री नरेन्द्र मोदी होर अज्ज बडलै 11 बजे आकाशवाणी पर “मन की बात” कार्यक्रम राएं अपने बचार सांझे करगंन।
- प्रधानमंत्री नरेन्द्र मोदी होरें अंतर्राष्ट्रीय अंतरिक्ष केन्द्र च गेदे भारतीय अंतरिक्ष यात्री ग्रुप कैप्टन शुभांशु शुक्ला हुंदे नै गल्ल कीती।
- उपराष्ट्रपति जगदीप धनखड़ होरें आखेआ ऐ जे कुसै बी संविधान दी प्रस्तावना ओह्दी आत्मा होंदी ऐ जिसी कदे बदलेआ नेई जाई सकदा।
- भारत च समाजी सुरक्षा स्कीमें दा लाह 94 करोड़ कोला मते लोकें गी पुज्जै करदा ऐ।
- कोलकाता लॉ कालेज बलात्कार मामले च पुलसै चौथे आरोपी गी बी गिरफ्तार करी लैता ऐ।
- भारत दी महिला टीम नै 5एं टी-20 क्रिकेट मैचें दी श्रृंखला दे पैहले मैच च इंग्लैंड गी 97 रंजें कन्नै हराई दित्ता।

<><><><><><><>

Mann Ki Baat

प्रधानमंत्री नरेन्द्र मोदी होर होर अज्ज दिने 11 बजे अपने माह्वार रेडियो कार्यक्रम “मन की बात” दे राएं देश-बदेश च रौह्ने आहले लोकें कन्नै अपने बचार सांझे करडन। एह् इस कार्यक्रम दी 123मीं किश्त होग जेह्दा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाह्ग। आकाशवाणी जम्मू आसेआ मन की बात दे तुरत मगरा एह्दा डोगरी च अनुवाद प्रसारत कीता जाह्ग जिसी तुस रातीं 8 बजे इक बारी परतियै बी सुनी

सकदे ओ। आकाशवाणी दा क्षेत्रीय समाचार एकांश जम्मू साङ्ढे 10 बजे मन की बात पर इक बशेश परिचर्चा बी प्रसारत करोग।

<><><><><><>

PM-Shubhanshu

प्रधानमंत्री नरेन्द्र मोदी होरें अंतर्राष्ट्रीय अंतरिक्ष स्टेशन पर गेदे भारत दे अंतरिक्ष यात्री गुप कैप्टन शुभांशु शुक्ला कन्नै कल गल्लबात कीती। मोदी होरें उनें आखेआ जे तुस भारत कोला भाएं बड़े दूर गेदे ओ, पर भारत दे करोड़ें लोकें दे दिलें दे भलेया कोल कच्छ ओ। मोदी होरें आखेआ जे तुंदी एह यात्रा इक नूँ युग दी शुरूआत दी प्रतीक ऐ। मोदी होरें आखेआ जे परदक्खन जां प्रक्रिमा करना भारत दी सदिएं परानी परम्परा रेही ते तुस इस साब्बै भाहगले ओ ते तुसें गी धरती माता दी परिक्रिमा करने दा मौका थोआ ऐ। प्रधानमंत्री होरें कैप्टन शुक्ला गी उंदे मिशन लेई शुभकामनां दित्तियां न। इस मौके शुभांशु शुक्ला होरें आखेआ जे उनें बचपन च कदे सोचेआ बी नेई हा जे ओह कदे अंतरिक्ष यात्री बनगंन। पर अज्ज प्रधानमंत्री हुंदी अगुवाई च देशवासिएं गी अपने सुखने सच करने दा मौका थोआ करदा ऐ। उनें आखेआ जे अंतरिक्ष च भारत दी अगुवाई करने पर उनेंगी बड़ा मान ऐ।

<><><><><><>श

VP

उपराष्ट्रपति जगदीप धनखड़ होरें आखेआ ऐ जे कुसै बी संविधान दी प्रस्तावना ओहदी आत्मा होंदी ऐ ते इसी बदलेआ नेई जाई सकदा। उनें आखेआ जे भारत गी छोड़ियै कुसै बी देश दे संविधान दी प्रस्तावना च बदलाव नेई कीता गेआ ऐ। नमीं दिल्ली च इक कताब दे विमोचन समारोह गी संबोधत करदे होई श्री धनखड़ होरें आखेआ जे प्रस्तावना गै ओ आधार ऐ, जेहदे पर संविधान विकसित होआ ऐ, पर दुखै दी गल्ल ऐ जे एहदे च अमरजेंसी दरान बदलाव कीता गेआ ते लोकें बी तकरीबन गुलाम बनाई दित्ता गेआ। श्री धनखड़ होरें आखेआ जे अमरजेंसी दरान प्रस्तावना च समाजवादी, धर्मनिपेक्ष ते अखंडता जनेह् शब्दे गी जोड़ना, संविधान निर्माताएं दी सोच कन्नै विश्वासघात ऐ।

<><><><><><>।

Amit Shah

केन्द्र गृहमंत्री अमित शाह होरें अज्ज तेलंगाना दे निजामाबाद च राश्ट्री हल्दी बोर्ड दा उद्घाटन ते सरकारी लोगो दा अनावरण करगंन। एह लोगो करसान नवाचार ते वैश्विक प्रतिस्पर्धा दे नमें युग दा प्रतीक ऐ। श्री शाह होर इस इलाके दे मन्ने परमन्ने दे लीडर डी. श्रीनिवास दी प्रतिमा दा बी अनावरण करगंन। श्रीनिवास होरें दाहके थमां नेकें क्षेत्रें च लोकें दी सेवा कीती। गृहमंत्री होरेंनिजामाबाद च इक करसान रैली गी बी संबोधत करगंन। श्री शाह हुंदा हैदराबाद च तेलंगाना दे बीजेपी लीडरें कन्नै मिलने दा बी कार्यक्रम ऐ।

<><><><><><>

ILD

भारत नै समाजी सुरक्षा च महत्वै आली उपलब्धि हासल कीती ऐ। 2015 च 19 प्रतिशत लोकें गी समाजी सुरक्षा दा लाह थोआ करदा हा जेहड़ा 2025 च बधियै 64.3 प्रतिशत होई गेआ ऐ। इस क्षेत्र च 94 करोड़ शा बद्ध लोकें गी घट्टोघट्ट इक समाजी सुरक्षा डा लाह तैहत आंदा गेआ ऐ। अंतर्राष्ट्रीय श्रम संगठन आईएलडी नै अपने डेटाबेस पर इक दहाके च होए दे इसअेजोड़ बाद्धे गी मन्नेआ ऐ। श्रम ते रोजगार मंत्री डॉ. मनसुख मांडविया होरें आखेआ जे प्रधानमंत्री नरेन्द्र मोदी हुंदी अगुवाई च भारत च समाजी सुरक्षा दे क्षेत्र च एतिहासक बाद्धा होआ ऐ। डॉ. मांडविया होरें सोशल मीडिया पोस्ट च अंतर्राष्ट्रीय श्रम संगठन दे महानिदेशक गिल्बर्ट होगबो बक्खी आभार प्रगट कीता।

<><><><><><>

Kolkata

पच्छम बंगाल दे कोलकाता लॉ कालेज च होए दे सामरिक बलात्कार दे चौथे आरोपी गी बी गिरफ्तार करी लैता गेआ ऐ। लॉ कालेज दे सुरक्षा गार्ड गी कल हिरासतै च लैता गेआ। जियां जे पैहले बी खबर दिक्ती जाई चुकी दी ऐ 25 जून गी दऊं विद्यार्थिएं ते कालेज च पढ़ी चुके दे इक पुराने विद्यार्थी नै गार्ड रूम च 24 ब'रे दी इक छात्रा दा सामरिक बलात्कार कीता हा। जेहदी शकैत पर पुलस नै मुख्य आरोपी मनोजीत मिश्रा, प्रोमित मुखर्जी ते जैद अहमद गी गिरफ्तार कीता हा। इस घटना गी लेइयै लोकें च बधदे गुस्से दे चलदे पुलसै मामले दी जांच लेई इक एसिस्टेंट कमीशनर दी अगुवाई च 5 मिनबरी इक विशेष जांच टीम दा गठन कीता ऐ।

<><><><><><>

Statistics Day

अज्ज सांख्यिकी दिवस ऐ। एह् ध्याड़ा हर ब'रे प्रो. प्रशांत चन्द्र महालनोबिस हुंदी जयंति दे उपलक्ष्य च मनाया जंदा ऐ जेह्ड़े स्टेट ते आर्थिक नियोजन दे क्षेत्र च आगु ऐ। इस ब'रे सांख्यिकी दिवस दा सिरलेख ऐ राश्ट्री नमूना सर्वे दे 75 ब'रे, एह् देसै च सबूतें दी बिनाह पर फैसले लैने ते शासन दा समर्थन करने आले बेल्ले सिर ते भरोसेमंद स्टेट डाटा प्रदान करने च राश्ट्री नमूना सर्वे दे महत्वै आले योगदान गी दस्सदा ऐ।

<><><><><><>श

MEA

भारत नै कल वजीरीस्तान च हमले लेई भारत गी कसूरवार ठैहराने दे पाकिस्तानी सेना दे अरोपें गी खारज कीता ऐ। भारत नै इक ब्यानै च पाकिस्तान दे अरोपें दी पूरी चाल्ली तगड़ेयाई कन्नै खारज कीता ऐ।

<><><><><><>

Women Cricket

महिला क्रिकेट च भारत नै 5एं टी-20 मैचें दी श्रृंखला दे पैहले मैच च कल नॉटिंघम च इंग्लैंड गी 97 रंजें कन्नै हराई दित्ता। कल रातीं खेड़्डे गेदे इस मैच पैहले बल्लेबाजी करदे होई भारत नै 20एं ओवरें 5एं विकटें दे नुक्सान पर 210 रंज बनाए। उह्दे परते च इंग्लैंड दी पूरी टीम 14.5 ओवरें पर गै आउट होई गई। स्मृति मंधाना नै टी-20 च अपना पैहला शतक बनांदे होई 112 रंज दा योगदान दित्ता। इंग्लैंड दी लॉरन बेल नै त्रै विकेटां लैतियां जिसलै के भारत दी श्रीचरणी नै इंग्लैंड दियां चारखंडारना आउट कीतियां। स्मृति मंधाना गी प्लेयर ऑ द मैच घोषत कीता गेआ।

<><><><><><>

Weather

मौसम विभाग नै उत्तराखंड ते उत्तर प्रदेश दे दूर दरेड़े इलाकें च कल तेज बरखा बरने दी पेशगोई कीती ऐ। विभाग मताबक बिहार, पच्छिम बंगाल, हरियाणा, चंडीगढ़, दिल्ली, हिमाचल

प्रदेश, झारखंड, कोंकण, गोवा, मध्य महाराष्ट्र, ओडिशा, पंजाब, सौराष्ट्र, उत्तर प्रदेश ते उत्तराखंड दिएं किश थाहरें पर अज्ज तेज बरखा बरी सकदी ऐ। कांकण, गोवा, मध्य महाराष्ट्र ते गुजरात दे तटीय इलाकें च बी अगले 6एं दिनें तगर इयै जनेह् हालात बने दे रौंहगन। मौसम विभाग नै देसै दे पच्छम, उत्तर प्छम ते उत्तर पूर्वी हिस्सें च हल्की थमां दरमयाने दर्जे दी बरखा बरने दा अंदाजा लाए दा ऐ।

<><><><><><>